

La'ó Hamutuk


Institutu ba Analiza no Monitor ba Desenvolvimentu iha Timor-Leste

I/1a Rua Mozambique, Farol, Dili, Timor-Leste

Tel: +670 332 5013

email: info@laohamutuk.org

Website: www.laohamutuk.org



Exmo. Sr. Kay Rala Xanana Gusmão
Primeiru Ministru,
República Democrática de Timor-Leste (RDTL),
Palacio do Governo,
Dili, Timor-Leste

13 Fevereiro 2009

Sr. Primeiru Ministru,

Oras ne'e ami hakarek ba ita-boot atu husu Governu Timor-Leste atu bolu ba proteksaun ba direitus ema sivil sira iha Sri Lanka.

Hanesan ita boot hatene katak tensaun violensia entre governu Sri Lanka no Liberation Tigers of Tamil Eelam (LTTE) sa'e aat liu tan desde forsa militar governu nian haforsa sira-nia operasaun, hodi uja violensia atu halakon opojisaun Tamil. Operasaun ne'e iha impaktu maka'as ba ema sivil sira, no la rekoñese katak tenki tuir dalan dame nian atu to'ó ba rezolusaun ne'ebé kle'an, ne'e be respeita hakarak legítimu husi parte rua ne'e. Nu'udar rezultadu, agora iha ema 'la'ós funu nain' rihun atus ba atus mak aserkadu iha funu nia laran. Sira lakon hahan, uma no asistenisia medika, mos asesu ba fatin seguru no neutru.

Hanesan povu ne'ebé esperiensa moris ona iha konflitu, husi funu, okupasaun no kolonializmu, povu Timor-Leste sente triste ba bu'at nebe maun alin sira iha Sri Lanka hasoru iha konflitu ne'e. Ne'e be ita mós halai sai husi uma. Ita-nia eskola, ospital, to'os no uma mos estraga hotu, no ida ne'e fo nafatin impaktu mai ita nia saude, edukasaun no vida moris ohin loran. Ita lori legadu violensia no brutalidade iha tinan barak nia laran, ho ita nia belun no familia sira nia mate. Ami husu Governu fo tulun diplomatika no politika ne'ebé hotu posivel atu hamenus terus hanesan ne'ebé oras ne'e povu Sri Lanka nordeste hasoru.

Belun barak husi Sri Lanka fo apoiu ba ita-nia luta ba independencia. Ohin, hanesan membru husi comunidade internacional, ita iha kapasidade atu fo tulun ba sira iha tempu difisil ne'e.

Semana ne'e, Prezidente Republika bolu ona ba aksaun atu proteje ema sivil sira no buka dalan ba prosesu dame ne'ebé legítimu. Ami husu Governu Timor-Leste atu tuir ejemplu Prezidente nian ne'e no kasu ita lian liu husi Nasoens Unidas no kanal seluk hodi husu ba:

- Establesimentu 'zona seguru' ne'ebé respeita husi parte rua, ho prezensa husi grupu independente hanesan Nasoens Unidas, iha ne'e be agencia humanitaria sira bele oferese hela fatin, hahan no ai-moruk ba ema sira nebe halai husi funu.
- Asesu ho livre no la limitadu ba fatin konflitu ba agencia humanitaria, parte ne'ebé monitor direitus humanus no media independente.
- Apoiu total ba prosesu atu fasilita LTTE no Governu Sri Lanka atu fila fali ba dialogu hodi buka rezolusaun ne'ebé respeita hakarak legítimu husi parte rua ne'e, no asegura direitu ba ema Tamil iha nordeste atu foti desijaun kona ba area ne'ebé sira hela.

Ami mos husu Governu Timor-Leste atu fo apoiu ba prosesu sira ne'ebé atu haforsa dame, haforsa dialogu no ajuda rekonsiliaun iha Sri Lanka, no atu garante katak ema hotu ne'ebé hela iha area ne'ebé diskute hela, la'os de'it militar no LTTE, bele participa iha foti desijaun kona ba futuru area ne'e nian.

Ami be saran lian,



Maximus Tahu

La'o Hamutuk,
Farol, Dili

CC: Sr. Atul Khare, Representate Espesial ba Sekretario Géral NU
Dr. Jose Ramos-Horta, Prezidente RDTL
Sr. Zacarias Albano da Costa, Ministru Negosius Estrangeirus